

EMANA MOSES YE INI UYEN ESIE KE EGYPT

Exodus 2:1-25

QYQHỌ UKPEP-ÑKPỌ 46

Eke Ikpọ Owo

IKỌ IBUOT: “Uwak ọniọñ ye ifiọk Abasi edituño adaña didie! Mme ikpe Esie ekak owo ndiduñre adaña didie, onyuñ ayaña owo nditiene nde usuñ Esie” (Ñwed Mbon Rome 11:33).

I Ufik Emi Ekefikde Nditọ Israel Ke Egypt

- 1 Idem akpa nditọ Egypt ke abaña nte nditọ Israel etọtde, Exodus 1:8-10; Psalm 105:23-25
- 2 Se nditọ Egypt ekedoride enyin nte ke eyemen ndik mmọ efep okpu, Exodus 1:11-14
- 3 Pharaoh ọnọ ọkpọsọñ ewuhọ ete efik nditọ Israel, Exodus 1:22; Utom Mme Apostle 7:6, 7, 18, 19

II Emana Ye Edida Moses Nsin Ke Ubon

- 1 Jochebed, eka Moses odip eyen esie onyuñ onim eyen esie añwan ete ekpeme enye, Exodus 2:1-4; Numbers 26:59; Mme Hebrew 11:23
- 2 Adiaha Pharaoh okut onyuñ enyene mbom abaña ekpři eyen oro, Exodus 2:5, 6
- 3 Miriam anam utom esie ke ndiñwam eyen eka esie ndidu ke ufọk eke ebakde Abasi, Exodus 2:7-9
- 4 Adiaha Pharaoh ada Moses esin ke ubon, Exodus 2:10; Utom Mme Apostle 7:20-22

III Se Moses Ekemekde Ye Se Iketienede Usọp-usọp

Edinam Esie

- 1 Moses emek ndikpọñ ebekpo Egypt man enyene ebuana ye nditọ Abasi, Mme Hebrew 11:24-26; Mark 8:35; 10:29, 30; Mme Hebrew 11:8-10, 13-16; John 4:32-38
- 2 Moses ọfuhọ abaña ufik nditọ ete esie onyuñ odomo ndinyaña mmọ, Exodus 2:11, 12
- 3 Sia edinam esie mikedighe ke ekem ini, nditọ Israel esin Moses nte ada-usuñ, mme, andifak mmọ, Exodus 2:13, 14; Utom Mme Apostle 7:23-28

IV Moses Efehe Aka Midian

- 1 Iyaresit Pharaoh anam Moses efehe ọkpọñ Egypt, Exodus 2:15
- 2 Oto ke mfọn ido Moses ye nditọ iban Jethro, oku Midian, mmọ eda Moses esin ke ufọk ete mmọ, Exodus 2:16-22; Genesis 29:10; Utom Mme Apostle 7:29
- 3 Ufik Nditọ Israel osuk aka iso ndien mmọ eseme ekot Abasi, Exodus 2:23-25; Numbers 20:14-16.

SE EKPEPDE EBAÑA

Tọñọ nte ikekpep ibaña mme ñkpọ-ntibe ke akpatre ukpep-ñkpọ ke Akani Ediomimi emi ọkọsuñode ke mkpa Jacob, ediwak isua ema ebe mbemiso ukpep-ñkpọ enye emi. Ke ini oro nditọ Jacob duopeba ye mbon ufọk mmọ ekenam ofuri esien Israel, ata ekpři otu owo ke ndida ndomo ye ediwak tọsin owo emi ekemanade ediana ke ubon mmọ ke Egypt ke ini emi ukpep-ñkpọ emi etiñde abaña, kpa ini emi ke Moses nte enye emi edidide ada usuñ akamana.

Ediwak ñkpọ ema ekpuhọre. Obufa Pharaoh emi mikọfiokke Joseph okodu ke ebekpo, enye ikekereke ite ke edi utom imọ ndi-nyene mfọnido ye owo emi akañwamde Egypt ke ata ọkpọsọñ ini. Enye akabare ese mme ekpeme-erọñ Goshen ke idiok enyin. Mbuk eset anam nnyin ifiok ite ke nditọ Egypt ema ebọ ufen ke ini edem ke ubok andikara mmọ, emi ekedide mme ekpeme ufene. Sia nditọ Israel ñko ekedide mme ekpeme ufene, nditọ Egypt ekekere ete ke mmọ edinyene ukem ido emi akpa mme andikara mmọ ekenyenede; edi edieke ukara idut oro ọkọwọrọde oduk ubok nditọ Israel nditọ Egypt ema efehe ndik ke se iditibede.

Akpa ñkpọ emi Pharaoh akanamde man obio esie okuduk ufin ekedi ndifik nditọ Israel nnyuñ nsin mmọ ke ufin. Ke idaha ntem ke mme mmọ emi ekedude ke ifure ye inemesit ini kiet ko ekekabare ekpa utom ke ediwak isua ke ndibop mme ikpọ obio nnọ mme andikara mmọ. Edi emi ikọwọrọke isu nte mmọ ekeyomde. Adaña nte efefik mmọ ntre ke mmọ edọdiọñ etọt enyuñ ewak.

Ukut ke ediwak idaha enyene akwa ufọn ọnọ anditiene-Christ. Ke mbuk eset emi abañade mme anditiene-Christ, imekeme ndikut nte mme anditiene-Christ emi ekenyenede ukobọ ekedi mmọ emi ekenyenede uforo ekan.

Uforo mmọ ikedighe ke nkpo uwem emi, ndusuk, mme ke uforo emi ekutde ke enyin ikpohidem, edi, edi uforo ye edidiọn emi ebighide ke nsinsi. Andiwet Psalm ọdọhọ ete ọfọn nte imọ ikokutde ukut; koro mbemiso ukut osim imọ, imọ ima idue. Ke ukut esie, enye ama ekpep mbet Abasi; ke edinam akpanikọ ye ikọt Esie, Enye ayak ukut osim mmọ (Psalm 119:67, 71, 75).

Mbuk nditọ Israel inyeneke ukpuhọre. Ufik mmọ ke isọn Egypt akanam mmọ eseme enọ Abasi eyom ubọhọ. Edieke mmọ ekpekenyenede emem ye idara ke uwem mmọ, mmọ ikpokoyomke ndinyọn nka Isọn Eñwọnọ emi akanade nte edi eke mmọ ke ekem ini Abasi. Ufik ikekemeke ndisuhọre ibat nditọ Israel, ndien Pharaoh akafiak ọnọ ewuhọ efem emi enye ekekerede ete ke eyesuhode odudu nditọ Israel. Edi enye akañwana ye odudu emi enye akanam midioñke. Iban nditọ mme Hebrew ekedi mme mmọ emi ebakde Abasi; ndien mbet Abasi emi akpande uwot-owo ama otim enyene oruñ ke esit mmọ (Genesis 9:6). Sia mmọ ekebakde Abasi ekan owo mmọ ema esin ndinam mbet emi Pharaoh ekenimde.

Akpatre ewuhọ emi ọkọdiokde akan ekedi, ndimen kpukpru nditọ iren emi emanade enọ mme Hebrew nduok nsin ke inyañ ke adañemi mmọ efiọhode. Ndusuk Pharaoh ekekere ete ke edinam emi eyenyene ufọn iba. Akpa edi ke iyenam nditọ Hebrew esuhọre ke ibat ke ini iso, ọyọhọ iba ke imọ ke iwawa owo inọ inyañ oro emi nditọ Egypt ekekponode nte Abasi. Ke akpanikọ, emi edi kiet ke otu nkpo emi akadade nsobo ọsok Egypt. Kpukpru ini, emi esinyik Abasi ke Heaven ndinọ ubierikpe esok mmọ emi mikponoke Enye, edi ekade iso ke ido ediwa mme owo emi mikemeke ndinyaña idem nnọ ndem. Ke ntak oburobut edinam emi, ema esisobo mme idut.

Se ikpetiede nte okpu ke uduak Pharaoh, emi otimde owut ubok utom Abasi, ekedi akpanikọ nte ke ewuhọ emi Pharaoh ọkọnọde ete ewot kpukpru nsek nditọ Israel; ekabade ndien ebok enye emi edidide ada usuñ Israel ke ufok esie, ke okuk esie, ye ke nda-usuñ esie. Andiwet Psalm esin nnyin ke uñwana ke abaña utibe ifiok Abasi emi, ke ndimenere ubon Abasi andiwet nwed emi ọdọhọ ete: “Koro ifuresit owo otorode fi” (Psalm 76:10). Mi ke eti ufañ-nwed Psalm emi ayarade idem. Ifuresit ye iyaresit Pharaoh ama añwam ndimek ikọt Abasi nditim mkpere Abasi, emi akadade iduọ ọsok obio Egypt mbio iseri, ye edimenere ubon Abasi ke ofuri ererimbot (Joshua 2:9, 10).

Moses akamana ke ufok Amram ye Jochebed, ke esien Levi. Eka esie ama enyene mbuotidem ke Abasi; ndien ke ini enye okutde nte eyen esie eyede, enye odip enye ke ofiọn ita. Ke ini enye mkekemeke ndidip enye aba, enye ayak enye esin ke ubok Abasi emi enye amade onyūn okponode. Man enye ekeme ndinam oro, enye ekenyene ndibemiso nnyene mbuotidem, kpa mbuotidem emi okponde, ke idem Abasi emi akanam mitreke ndikere mbaña ikọt Esie. Enye esin eyen ke ekpri akpasa emi enye akanamde onyūn ada enye okonim ke nnyanyaña ke mben akpa. Abasi ama okpono mbuotidem esie onyūn ada Adiaha Pharaoh aka ke ebiet oro, ndien ke ini enye okopde uyo nsek-eyen, emi ama anam ima eka eyen edemere ke esit esie.

Eti ekikere emi Abasi ke Idem Esie ọkọnọde ndida nwan Hebrew kiet nte edep ama ada Moses esin ke ubok eka esie ke mme isua uyen esie. Ikedighe nkpo efem ke mibohoke ubok Abasi akanam emi. Emi ọwọrọ ete eyekpep Moses ndikpono ata Abasi ye mbet Abasi Ibom, idighe ido ukpono ndem obio oro. Ke akpanikọ, eka esie ama etiñ ọnọ enye mme ediomu ye mme eñwọnọ Abasi emi akanade nte osu, ndien esit akparawa emi ama omum mme ukpep-nkpo oro akama emi akañwamde enye ke ini enye ama okokpon ndinam ekikere idemesie.

Nnyin imokot ke nwed mme Hebrew nte Moses akadade eti ibuat emek ke ini akanade nte enye emek nkpo Abasi mme nkpo ererimbot. Nte Abraham, enye ekesin esit ke nkpo eke okponde akan se owo ekemede ndinyene mme se ererimbot ekemede ndinọ. Udon esie ekedi ndinem Abasi esit nnyūn nnam nkpo Esie, okposuk edi editakde enye ebekpo ubon, akwa inyene, ukpono ye inemesit uwem emi. Owo ifañ ke ini oro ye idaha emi ekeme ndinam utọ nwaidem oro.

Edi akwa owo emi, okposuk edi okokponode Abasi okosuk edi owo; nte akana nte Abasi otim enye idem ebeñe utom eke enye edinamde ke ini iso. Moses ama otim oyom utọ ukpep-nkpo emi, koro akpa edinam esie ke ini enye akakade ndidun ye nditọ-ete esie ama owut nte. Enye ikebetke ini ye nda-usuñ Abasi, edi akañwana ndisio usiene nnọ eyen Hebrew emi ekefikde. Ke idak unana ime ye ifiopesit, Moses ama owot eyen Egypt onyūn odip okpo esie ke ntan. Uduak Moses ke abaña edinam esie ama ọfọn. Enye ama ofiok ete ke ndisin owo ke ufin edi se idiokde onyūn ekere ete ke akpana enam ata akpan nkpo nditre utọ edinam oro ke ifet eke enye ekenyenede, edi okposuk edi nte nkpo oro okoyomde usop-usop edinam, iyenọ idem nnyin okposon ufem edieke ibemde ini ye uduak Abasi iso.

Jacob akada kpukpru nkpo esin ke ubok esie oyom ndibọ edidiọn emi Abasi ọkọñwọnọde; utu ke ndiyak Abasi ọnọ enye, Jacob okoyom ke odudu idemesie. Ibọrọ ekedi ke Jacob okoyom mme nkpo uwem emi utu ke ndiyom mme eñwọnọ ye mme edidiọn eke Spirit emi Abasi ekebeñede onim ọnọ enye; ndien sia enye akanamde ke idemesie, Abasi asana enye ayak ọnọ idemesie. Enye ama akpa utom ke ediwak isua ndinyene mme nkpo uwem emi Abasi okpokonode enye okorọ ye mme edidiọn ke spirit eke Heaven okonimde ọnọ enye. Moses

ndibem Abasi iso akakpa enye ediwak isua utom, ufen ye edidianare enye ye nti nkpo okoro ye uku emi enye ekpenyenede ke ufot nditọ-ete esie Israel.

Ikpokom Abasi didie koro nnyin inamde nkpo ino Abasi emi enyenede esit mbom ye ima onyũ otimde ofiok nkpo akan. Kot Psalm 103:13-18. Ikpenyene didie esit ekom koro edieke ke ndudue nnyin ibemde Abasi iso, oto ke unana ime ye ifiopesit, edieke nnyin idikopde item Esie, Enye ke mbom eyeda nnyin afiak edisin ke ufok-nwed Esie, otunọ nnyin, onyũ ekpep nnyin nditiene Enye ke edem. Kot Isaiah 40:11; Psalm 23:1-6; John 10:1-18.

MME MBUME

- 1 Nso ikedi enyiñ ete Moses, eka, eyen-eka esie añwan ye eyen eka esie eren?
- 2 Nso idi ntak emi ekesinde Moses ke akpasa nkukip ke ini enye edide nsek eyen?
- 3 Nso utom ke eyen-eka Moses añwan akanam ke edidip Moses?
- 4 Ke nso usuñ ke eyen eka Moses añwan akada eti-ibuot anam nkpo? Nte emekeme nditiñ, ete ke edinam esie okoto ifiok esie mme Abasi akada enye usuñ?
- 5 Anie akada Moses esin ke ubon, nso uñwam ke enye okobọ oto edinam emi?
- 6 Moses akadara didie itie ubon esie ye mme mfon emi enye ekenyenede ke ini enye ama okokpon?
- 7 Nso ikedi usọp-usọp edinam Moses?
- 8 Nso ke edinam Moses emi akada edi ke ufok edidem?
- 9 Moses ekefehe aka ebiet ewe?
- 10 Ke Moses ama ekebem Abasi iso ke edinam esie onyũ efehe okpon Egypt, nso edu-uwem ke nditọ Israel ekenyene ebaña Abasi?